

**Mbete kí  
Judi  
ndàngì**

**Ta-je kí dɔ mbete-ti kí Judi  
ndàngì**

Judi ndàngì mbete kí gɔji kin adi dow-je kí Lubə ɓa-dé, ndigi-dé ɓá ngəm-dé adi Jeju Kristi (Lo ndó-é kí 1). To njékadmɛɛ-je kí rá ɓá ɛ ndàngì mbete lé adi-dé kàrè dow gə al. Ɛ ndàngì mbete ndəji-dé-né sobi dɔ njéndó dow-je né-je kí ngom kí njékisi dan majal-ti. Njèndàngì mbete lé tɔji rɔ-é kí n'to «Judi, ngonnjèkullə lə Jeju Kristi, n'to ngonkɔ Jaki» (Lo ndó-é kí 1). A to Jaki kinlé ya ɓá ndàngì mbete kí ri-é tò dɔ-ti mɛɛ kunmindi-ti kí sigi ('Ndó ta-je kí dɔ mbete-ti kí Jaki ndàngì). Judi dɛ kì Jaki 'to ngankɔ Jeju ('Ndó Mat 13:55; Mar 6:3). Néndó-je kí ngom lé isi taa lo adi Judi inə kɔ ta kí dɔsɔy ə təl ulə dingəm mɛɛ dow-je kí ɛ ndàngì mbete kin kdɔ kadi-dé lé, kdɔ kadi 'rɔ kdɔ kadmɛɛ (Lo ndó-é kí 3). Dan njèndàngì mbete kunmindi kí sigi lé, dow kí pa ta kí dɔ ta kí gangi-ti lə njékəɗta-je kin ngə nɔ asi kì Judi ya goto. Ta kí gangi kí sobi dɔ majal kí tò mɛɛ Kunmindi-ti kí Low rəm, ɓá ɛ kí tò mɛɛ mbete-je-ti kí rangi kí goto mɛɛ Kunmindi-ti kí Low rəm lay ya Judi təl un pa mɛɛ mbete-ti kinlé. Ta-je lə njèkɔwkulə Piyər kí pa mɛɛ Mbete-ti liə (2Pi 2:1–3:4) kin kàrè ɛ pa tɔ. Ɛ ole mɛɛ dow-

je kí ɛ ndàngi mbete adi-dé, kí njékɔwkuɔlɔ-je lə 'Babe Jeju Kristi 'pa ta-é kete kí ko dow-je kí bè kin d'a ree nɔɔ, bá ɛ ulə dingəm mɛɛ-dé-ti kadi d'a gərərə dɔ kadmɛɛ-ti. Ɛ tɔl ta mbete liə kɪ tɔrɔndi dɔ dow-je-ti kí ɛ ndàngi mbete adi-dé rəm bá ɛ ɔsi gaji Lubə rəm.

*Tɔji rɔ kɪ lapiya kí ra*

<sup>1</sup> †Ma Judi ngonnjèkullə lə Jeju Kristi rəm, ngonkɔ Jaki rəm, bá m'ndàngi mbete kin m'adi-si sɔi kí Lubə kí Bɔbi-ji ba-si rəm, ində-si dan kəm-é-ti rəm, bá ngəm-si kɔ Jeju Kristi. <sup>2</sup> Kadi Lubə adi koo kəmtondoo, kɪ lapiya, kɪ ndigi liə tɔ mburuki-mburuki dɔ-si-ti!

*Njékilə kuji dɔ Lubə-ti al kɪ kullə ra-dé-je*

*2Pi 2:1-22; 3:1-3*

<sup>3</sup> Sɔi kí m'ində-si dan kəm-m-ti, kaji lə-ji kí j'ori-nə dɔ-ti lé low nɔ ya bo ndàngi ta kí sɔbi dɔ-é kadi-si ra-m loti-loti, ngà kí nè kinlé m'oo kí tɔ dɔ-m-ti kadi m'ndàngi m'adi-si kɔ kadi m'ulə-né dingəm mɛɛ-si-ti kadi 'rɔi dɔ kadmɛɛ-ti kí Lubə adi njékaa njay-je nja káre-rè ya sartagangi. <sup>4</sup> Kɔɔtalə dow-je madi 'tandi dan-si-ti nɔɔ ɔ to dow-je kí ta kí gangi kí dɔ-dé-ti kàrè ta-é toki ndàngi low nɔ rəm ngá. Dɛ d'ilə kuji dɔ Lubə-ti lə-ji al, adi ta lə ramaji liə kin bá tɔl to jirə ra kaya lə-dé rəm, bá Ngar lə-ji kí káre-rè kí to 'Babe Jeju Kristi kin kàrè 'naji 'pané 'gə-é al rəm tɔ.

<sup>5</sup> To né-je kí 'gəi lay ya ngá, ngà m'ndigi kole mɛɛ-si dɔ-ti kí ndɔki 'Babe taa Israyel-je kí 'to gin

† **1:1** 1:1 Mat 13:55; Mar 6:3

dow-je liə ilə-dé taá dɔnangi Ejipti-ti ya, ngá go-ti adi njémɛngɔ-je d'oy. <sup>6</sup> Malayka-je kí 'ngəm kasi gaki lə-dé al, ngá d'ɪ̃ə lo kisi-dé kí sobi dɔ-dé lé, 'Babe ilə-dé sil kilə kí sartagangi kiring lo kí ndul-ti kɔɔ ngəbi-né ndɔ kí boy kí to ndɔ gangta. <sup>7</sup> Bè ya tɔ, loki dow-je kí Sɔdɔm kɪ Gɔmɔr kɪ bebo-je kí tò sə-dé ngɔsi d'ungi-nɔ ko kaya-é-ti kin adi 'ra kaya d'ur-né kɔbi-ti kí dum lé, Lubə un pər kí tò sartagangi bá adi-dé-né kɔ kadi dow-je d'oo-né tɔ.

<sup>8</sup> Lay bè ya kàrè, dowbé-je kí 'tandi dan-si-ti kinlé, tagir-je lə-dé kí mɛɛ wəy ra adi d'un rɔ-dé 'ra-né né kí tò nɛ rəm, 'nədi tɔgi kí 'Babe ɔw-né dɔ-dé-ti rəm, bá 'pa ta kí maji al dɔ njériɓa-je-ti\* rəm tɔ. <sup>9</sup> † Misəl kí to káre dan 'boy-je-ti lə malayka-je kin ya kàrè, loki mbati ta ta Sú-ti ə naji-é-né ta-ti kí sobi dɔ nin Moiyiji lé, ɛ pa ta kí maji al dɔ-é-ti gangi-né ta dɔ-é-ti al. Ngá Misəl lé panè: Kadi 'Babe ndángi-i!

<sup>10</sup> Ngá dowbé-je kinlé, né kí 'gə al ya kàrè 'pa ta kí maji al dɔ-ti ə dɛ lé nɛgə lə-dé kí koji-dé-ti kí toki nɛgə lə dɔ-je bè kinlé, tò kɔɔ tuji lə-dé ya par. <sup>11</sup> Tuji à kusi dɔ-dé-ti! Kɔɔtalə dɛ d'un dɔ nja Kayin; ə ta lə là ya dɛ d'ɪ̃ə-né rɔ-dé yaki 'ndaji-né kullə dɔkində lə Balam rəm, bá ko dɔngɔ lə Kore adi d'oy kɔgi rəm tɔ.

<sup>12</sup> Dɛ bá 'to njéjunglu lo nékuso nam lə-si. D'ilə rɔsɔl kɔgi ya d'uso né ublu-ublu ə kəm-dé tò ki dɔ rɔ-dé dɛ-ti ya. 'Tanɔ kí ndi kí ɔw

\* **1:8** 1:8 Njériɓa-je kinlé dow-je madi 'panè to ndil-je, dɛ kí nɔ-je 'panè to Malayka-je ə dɛ kí rangi 'panè to ta kí sobi dɔ dow-je kí ri-dé ɓa nɔ tɔ. † **1:9** 1:9 Ntd 12:7

kì kədi al ya kàrè ijə damdər fá yél ɔr-é kəgi kin bè rəm, 'tanə kì kagi-je kí d'a kandi nɔykada ya rəmə d'andi al kin bè rəm, d'ɔr-dé kì njirə-dé burə, d'oy nja joo; <sup>13</sup> 'tanə kì pungum man babo kí tal bum-bum ə ungi əm-é kí tò nɛ ndaa-ti kin bè rəm, 'tanə kì kərwəi-je kí njékilə mbuu ə Lubə ra lo kí ndul ndi-ndi kí à tò sartagangi ya isi ngəbi-dé-né kin bè.

<sup>14</sup> Enəki kí to gin ka kí njəkungi-ti siri go Adam-ti lé kàrè, pa ta kí ta Lubə-ti sɔbi-né dɔ dowbé-je kinlé panè: «Ooi, 'Babe à ree kì kosi malayka-je liə kí d'aa njay kí kɔr-dé ra budoɔgi dɔgi lo nɔ <sup>15</sup> kɔɔ gangi-né ta dɔ-dé-ti lay rəm, kɔɔ kadi dow-je lay kí njékilə kuji dɔ Lubə-ti al lé, d'ɔr go kullə ra-dé-je lay kí ɔsi ta Lubə rəm, d'ɔr go ta-je lay kí ngə-ngə kí 'pa d'ɔsi-né Lubə kì ta kin rəm tɔ.»

<sup>16</sup> Dowbé-je kinlé, 'to njéyun ta-je, kì njébaa ta-je, kì njéra kəmnda né-je. Dɛ 'tidə ta-je kí al dɔ-dé dɔ-dé d'ədi-né kəm dow-je kɔɔ kingə-né né ji-dé-ti.

<sup>17</sup> Ngə səi kí j'ində-si dan kəm-ji-ti lé, né-je kí ndəki njékɔwkulə-je lə 'Babe lə-ji Jeju Kristi 'pa ta-é d'adi-si kinlé, adi mɛɛ-si ole dɔ-ti. <sup>18</sup> †Ndəki d'idə-si 'panè: «Kaglo-je-ti kí dɔbəy-ti lé, dow-je d'a to njésɔklo-je ə d'a ra né-je kí ilə kuji dɔ Lubə-ti al kí go gangi-é-ti kí kəmnda-é ra-dé-né.»

<sup>19</sup> Ooi, dowbé-je lé ya ngá ɛn! Dɛ 'to njéra dow-je kadi 'gangi-nə, 'to njéra né kí daji rɔ-dé ndigi, 'to dow-je kí Ndil kí aa njay goto mɛɛ-dé-ti.

*Ta kullə dingəm mɛɛ-ŋə-ti*

<sup>20</sup> Ngà sɛi kí j'ində-si dan kəm-ji-ti kinlé, sɛi ya kì dɔ rɔ-si 'mbusi nja-na dɔ kadmɛɛ-ti lə-si kí aa njay kin rəm, 'pai ta kì Lubə kì takul Ndil kí aa njay rəm, <sup>21</sup> ɛi gərərə mɛɛ ndigi-na-ti lə Lubə 'ngəbi-né koo kəmtondoo lə 'Babe lə-ji Jeju Kristi kdɔ kiskəm kí tò sartangani.

<sup>22</sup> Dɛ kí nɛ-je kí 'tadi tii-tii lé, ooi kəmtondoo lə-dé <sup>23</sup> adi to kaji kí kadi aji-dé ta pər-ti. Ngà dɛ kí dan-ti-je rəm, ooi kəmtondoo lə-dé kì bəl mɛɛ-si-ti, ə itəi majal-je lə-dé ngərəngi kì kubi-je kí rɔ-dé-ti burə titi né kí kubi-je lə-dé kàrè majal ra adi tò nɛ bə tɔ.

<sup>24</sup> Njəkasi ngəm-si kadi kusi ya usi al, kí to njəkadi ɛi dan rɔnəl-ti lo riba-ti liə kì ta dɔ-si-ti al kinlé, <sup>25</sup> to Lubə ya kì kár-é, Njəkaji-ji kì takul 'Babe lə-ji Jeju Kristi. Low lə low-je rəm, bone bə kin rəm, bá kì dɔ bal-bal rəm kin ya kadi kɔsgaji, kì kɔbe, kì rɔngɔ, kì tógi to kí liə! Amen!

**Ta lə Lubə Kunmindí kí Sigi**  
**Mango: Ta lə Lubə Kunmindí kí Sigi (New**  
**Testament)**

copyright © 2019 Wycliffe Bible Translators, Inc.

Language: (Mango)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

96bdbd07-24d6-556c-9e7c-7269c72880cd